

**Sha'ningni
yoshlikdan
saqla**

3 - betda

**Bolangizning
sog'lig'i necha
pul?**

5 - betda

**Ko'kdalaning
yulduzlari**

6 - betda

Bilasizmi?

8 - betda

TONG YULDUZI

Ona yurti — oltin beshigi

O'zbekiston Respublikasi bolalari va o'smirlari gazetasi

Gazeta 1929-yil 1 avgustdan chiqib boshlagan

2007 yil
23 - 29 aprel
N:17
(66610)



Ruslan Chagayev haqidagi maqolani 2 - betda o'qiydiz.

DUSHANBADAN

Aziz bolalar!

O'tgan haftada mamlakatimiz hayotida juda ko'p voqealar ro'y berdiki, ularning har biri haqida alohida to'xtalib o'tmasdan bo'lmaydi.

17-19 aprel kunlari Prezidentimiz Islom Karimov Misr Arab Respublikasida bo'lib qaytdi.

* * *

O'zbekiston Respublikasi Prezidentining Farmoni bilan Ruslan Chagayev akangiz «Buyuk xizmatlari uchun» ordeni bilan mukofotlandi.

Sizning nomingizdan chempionimizni tabriklaymiz!

* * *

Hindistonning poytaxti Dehlida yurtboshimiz I.Karimovning «O'zbek xalqi hech qachon, hech kimga qaram bo'lmaydi» nomli kitobi taqdimoti bo'lib o'tdi.

* * *

Bu yilgi «Universiada - 2007» sport musobaqalari Toshkentda o'tkaziladigan bo'ldi.


Siz-chi, aziz yoshlar, tayyorlikni boshladingizmi?

DUSHANBAGACHA

ZAFAR

TUG'IN

KO'TARGAN LOCHIN



CHEMPIONGA ATALGAN QO'SHIQ

Tongda maktabimizda katta tantana bo'ldi. Hamma shod, xursand edi. Biz musiqa o'qituvchimiz Zulfiya Zokirova yordamida Ruslan akaga atab qo'shiq yozdik va uni birgalikda kuyladik. Bundan shunday xursand bo'ldikki, sevinchimizning chek-chegarasi yo'q. G'alaba muborak, chempion aka!

Feruz NE'MATOV,

Toshkent shahri, Yunusobod tumanidagi 17-maktab o'quvchisi

...Aytishlaricha, shoh va shoir Bobur Mirzo hamma ishda zafar quchishni yaxshi ko'rgan, bu yo'lda uchraydigan zahmatlar, mehnat va mashaqqatlarga bardosh bergan ekan.

Kuni kecha butun dunyoni lol qoldirgan hamyurtimiz andijonlik Ruslan Chagayevning quchgan g'alabasiga balki o'sha buyuk zotlarning ruhi madadkor bo'lgandir...

Professional boks bo'yicha WBA (Butunjahon boks Assotsiatsiyasi) yo'nalishida o'ta og'ir vazn toifasida jahon chempioni bo'lgan Nikolay Valuyev o'z taxtidan ag'darildi.

Shu paytgacha profi-ringda 46ta jang o'tkazib, undan 45tasini g'alaba bilan yakunlagan rossiyalik bokschi mag'lubiyat neligini bilmay kelayotgan edi.

VATANGA AYLANISH

G'alabaning ta'mi shirin, deydilar,
Azoblari garchi o'tadi jondan.
Vatanini sevgan farzand buyukdir,
Yana derlar, uni sevish iymondan.
Ringga mag'rur chiqib borganda Ruslan,
Yuragida yurt sevgisi yonardi.
Balki shuning uchun zafar quchdi u,
Bu asl o'g'longa el ishonardi.

G'alaba qozondi yurt mehri bilan,
Dunyo nazariga tushgan qahramon.
Suyunib bag'riga bosar otaday -
«Bu mening bolam», deb jon O'zbekiston.

Hamyurtimiz Ruslan Chagayev esa yosh bo'lishiga qaramasdan havaskor bokschilar o'rtasida ikki marta jahon chempioni bo'lishga erishgan, Osiyo o'yinlari g'olibi, Markaziy Osiyo o'yinlari chempioni va shu kabi qator g'alabalarni qo'lga kiritgandi.

Aynan 2000 yilda hamyurtlarimiz Ruslan Chagayev va Muhammadqodir

Abdullayev professional boksga o'tishga qaror qilishdi. Ezgu ishni boshlashdan oldin esa bokschilarimiz muhtaram Prezidentimiz Islom Karimovdan oq fotiha olishgandi.

Ruslan Chagayev g'alaba odimlarini profi-ringda ham davom ettirdi. Barcha janglarni yaqqol ustunlik bilan, aksariyatini raqibni nakautga uchratgan holda yakunlar edi.

2006 yil amerikalik dongdor bokschi, sobiq jahon chempioni Jon Rund ustidan qozonilgan ajoyib g'alaba Ruslanga WBA yo'nalishida, o'ta og'ir vaznda jahon chempioni rossiyalik Nikolay Valuyevga qarshi kamar uchun jang o'tkazish huquqini berdi.

14 aprel kuni Germaniyaning Shtutgart shahrida o'tgan jang esa butun dunyoga kim aslida kim ekanligini yaqqol namoyon etdi. Axir Nikolay Valuyev Ruslan Chagayevdan anchagina, aniqrog'i, 28 sm. uzun, 41 kg. og'ir vaznga ega edi. Ko'pchilik Valuyevning kuchli zarbalari Ruslanni mag'lubiyat ko'chasiga yetaklaydi, deb o'ylagan edi. Ammo bashoratning aksi bo'lib chiqdi. Hamyurtimiz raqibini murosasiz kurashda yengdi. Jangdan so'ng Valuyev «Revansh» bahsiga hojat yo'qligini tan oldi.


Aziz o'zbekistonliklar!

Sizlarni yana bir jahon chempioningiz bilan qutlayman. Men o'zim O'zbekistondan bo'lganim uchun ham bu g'alabadan g'ururlanib, boshim osmonga yetdi.

Jahonda hilpirayver, o'zbek bayrog'i!

Artem GRIN,

Belorussiya respublikasi, Mogilyov viloyati,
Bobruysk shahridagi 71-maktabning 3-sinf o'quvchisi



1993 yilda Termiz shahrida kurash bo'yicha Al Hakim at-Termiziy xotirasiga bag'ishlangan xalqaro turnir bo'lib o'tgan va g'oliblar aniqlangan edi.

Aziz kurashsevar bolajonlar, ushbu turnir har ikki yilda bir marta tashkil etilishini yaxshi bilasizlar-a?

12-14 aprel kunlari Termizdagi «Alpomish» o'yingohida Al Hakim at-Termiziy xotirasiga bag'ishlangan O'zbekiston Respublikasi sovrini uchun kurash bo'yicha an'anaviy VIII xalqaro turnir, shuningdek, birinchi marta

ayollar o'rtasida faxriy pahlavonlarning ikkinchi jahon chempionati bo'lib o'tdi.

Xalqaro turnir 60, 66, 73, 81, 90, +90 kg. va mutlaq vazn toifalarida o'tgan bo'lsa, dunyoning eng kuchli polvon qizlari 52, 63, va +63 kg. vaznlarida gilamga chiqishdi.

An'anaviy xotira turnirida bosh mukofot - Prezident sovrini uchun bahslar mutlaq vazn toifasida bordi.

Saralash bahslariga polvonlarimiz Abdulla Tangriyev va Shuhrat Murodov, braziliyalik polvonlar Volter Dos Santos hamda Aleksandr

Gedis yarim finalgacha yetib kelishdi.


Finalda Abdulla Tangriyev Dos Santosni mag'lubiyatga uchratishga muvaffaq bo'ldi. Demak, finalda O'zbekiston va Braziliyaning eng kuchli polvonlari Tangriyev va Aleksandr Gedis uchrashadi. Hayajonli uchrashuvda bizning polvonimiz O'zbekistonga faqat g'alabalar yarashishini yana bir bor isbotlab berdi. U raqibini «halol» bilan yiqitdi va Prezident sovrinini qo'lga kiritdi.

Ma'mura MADRAHIMOVA

G'ALABA SHOHSUPASIDA YANA ABDULLA POLVON

SHA'NINGNI

Qizlarjon! Bugun yana Siz haqingizda so'z yuritishni lozim topdik. Sizning go'zal xulqingiz, aql-zakovatingiz, nafosat va nazokatingiz tahsinga loyiq. Ko'nglingiz kabi qo'lingiz gul, yuzingiz guldir. Shuning uchun ham Siz bor joyda musaffo havo bor. Saranjom - sarish-talik bor.



YOSHIDAN

SAQLA

Faqat qizlar o'qisin!

likamizdagi eng iqtidorli qizlardan

112 nafari Zulfiya nomidagi Davlat mukofotiga sazovor bo'lganligi ham fikrimiz isbotidir.

Mukofotga da'vogarlik qilgan Begoyimlarning esa son-sanog'i yo'q. Raqamlarga e'tibor qaratsak, 2004 yilda 5 ming nafarga yaqin da'vogar bo'lgan bo'lsa, 2005 yilda bu ko'rsatkich 11 mingdan oshib ketdi. 2006 yilda esa umumta'lim maktablari hamda kollej va litsey o'quvchilarining ishtiroki 2 million nafarga yetdi. O'zbekiston Respublikasi Prezidentining 2006 yil 2 fevraldagi Farmoniga asosan Zulfiya nomidagi Davlat mukofoti yana-da «yoshardi». Mukofotni 25 yoshgacha emas, balki 14 yoshdan 22 yoshgacha bo'lgan qizlarga berish maqsadga muvofiq deb topildi.

Afsuski, orangizda Sizdan ibrat olishga shoshilmayotgan Oyimqizlar ham topiladi.

Yaqinda ma'naviyat fani o'qituvchisi «Muomala madaniyati» mavzusi bo'yicha 9-sinf o'quvchilaridan

bir nechtasi ikki baho olganini va ularning barchasi qizlar ekanligini kuyunib gapirib berdi. Bu holga biz - ustoz-u onalarning biroz bee'tibor bo'layotganimiz sababmikin, deb qo'shib qo'ydi.

Yana bir ustozning, oliy o'quv yurtini bitirib, maktabda dars bera boshlagan yoshgina, soddagina hamkasbini o'quvchi, uning yonidagi bashang kiyingan, pardoz-andozni joyiga qo'ygan o'quvchini esa o'qituvchi deb o'ylaganini aytganida, uyatdan ko'zimizni qayoqqa olib qochishni bilmay qoldik.

Yoki avtobusda hech kimga e'tibor bermay, hayosizlarcha gapdan bo'shamayotgan Oyimqizlarga tanbeh berishga oshiqqan otaxon-u onaxonlarning gaplari og'zilarida qolgani, shuningdek, birovlarga taqlid qilib, o'ziga yarashmagan yarim yalang'och kiyinib olganligi atrofdagilarni, ayniqsa, o'ktam yigitlarning g'ashiga tegayotgani yana-da achinarlidir.

Bobokalonimiz Mir Alisher Navoiy:

Xo'bkim, yo'qtur shamoyil birla

shirin so'z anga,

Saydi bo'lmas el, nechakim

bo'lsa zebo suvrati,

deganida inson qancha go'zal, zebo bo'lmasin, agar unda shirinso'z, yaxshi xulq, odob-axloq bo'lmasa, uni zebo deb bo'lmasligini ta'kidlab o'tadi.

Shunday ekan, jondan aziz bo'lgan Oyimqizlar, suratlarigizni emas, siyratlarigizni go'zal qilishga harakat qiling. Insondagi asosiy go'zallik uning ichki go'zalligi, ma'naviy-ruhiy go'zalligida va albatta aql-idrokida ekanligini aslo unutmang.

Feruza SOYIBJON qizi,

O'zbekiston Respublikasi Xalq ta'limi a'lochisi

Sizni Begoyim deylikmi, O'zbekoyim yoki Oftobjamolim deb erkalaylikmi, bariga munosibsiz. Chunki Siz jasorat va matonatda, nafosat va nazokatda, aql-zakovatda o'chmas iz qoldirgan momolarimiz - To'maris, Saroyimulkxonim, Nodirabegim, Gulbadanbegim, Zebunnisobegim, Uvaysiy va Anbar otin kabi yorqin siymolarning avlodlarisiz. Ularga xos bo'lgan oliyjanob fazilatlarining barchasi Sizda mujassam, Sizga merosdir.

Bugungi kunda Sizning ishtirokingiz bo'lmagani sohaning o'zi yo'q. Adabiyot deysizmi, matematika, tasviriy san'atmi yoki sport, barcha sohada labbay deb javob bermoqdasiz. Davlatimiz ham Sizning tarbiyangiz, iqtidoringiz, salohiyatingizga alohida e'tibor qaratmoqda. Mana, 8 yil davomida Respub-

ENG YAXSHI NUTQ EGASI

Maxsuma Yo'ldosheva Toshkent viloyati, Toshkent tumanidagi 9-umumiy o'rta ta'lim maktabining 8-«G» sinf o'quvchisi. U haqiqatan ham maktabimizning a'lochi va jamoatchi o'quvchilaridan biridir. Hozirda o'z sinfida sardor bo'libgina qolmay, maktabdagi «Kamolot» Yoshlar ijtimoiy harakati sardorlar kengashi raisi vazifasida ish olib bormoqda. Tuman «Kamolot boshlang'ich tashkiloti»da esa «Oltin meros» yo'nalishi sardori etib tayinlangan.

Sinfdoshlari orasida muntazam o'quv reytlari

ZUKKO KAMOLA

Kamola Mahkamova maktabning eng zukko o'quvchilaridandir. U 9 yildan buyon a'lo baholari, namunali xulqi va jamoat ishlarida faolligi uchun «Maqtov yorlig'i» bilan taqdirlanib kelmoqda. «Kamolot» Yoshlar ijtimoiy harakatining tuman miqyosidagi tadbirlarida maktab jamoasi sardori sifatida qatnashadi.

«Siz tarixni bilasizmi?» ko'rik-tanlovida jamoa sardori bo'lib, tuman va viloyatda faxrli 1-o'rinni

HUSNIXATDA BIRINCHI

Shuhratjon oilaning ikkinchi farzandi. U 2005 yilda 1-sinfga o'qishga qabul qilingan. O'qish va jamoat ishlarida faolligi bilan boshqa o'quvchilardan ajralib turadi. Shuhratjon «Husnixat» ko'rik-tanlovida qatnashib, tuman miqyosida 1-o'rin sohibi bo'ldi. Badiiy adabiyotga qiziqish bilan birga, bo'sh vaqtlarida kichik hikoya va ertaklar yozib turadi. «Yosh kitobxon» to'garagi a'zosi.

o'tkazadi. O'zlashtirishi past o'quvchilarga yaqindan yordam berib, tarbiyaviy soatlarda turli mavzularda ma'ruzalar o'qiydi. Eng quvonarlisi, maktab o'quvchilari ishtirokida «Zakovat» intellektual o'yinlarini o'tkazib turadi.

Tumanda ham juda yaxshi faoliyat ko'rsatadi. Ikki marta KBTK konferensiyasida ham ishtirok etgan. Bundan tashqari, «Sardor - 2006» ko'rik-tanlovida «Eng yaxshi nutq egasi» nominatsiyasiga sazovor bo'ldi. Bir so'z bilan aytganda, Maxsuma maktabimiz faxri sanaladi.

Maktab direktori Z.JALILOVA

egallashda xizmati katta bo'ldi. Hozirda uning jamoasi Respublika ko'rik-tanlovi bosqichiga qizg'in tayyorgarlik ko'rmoqda. Kamola ingliz tili, ona tili, adabiyot, tarix fanlaridan olimpiadalarda qatnashib, sovrinli o'rinnlarni egallagan.

Namangan shahri, Chortoq tumanidagi 33-umumta'lim maktabi jamoasi Kamoladek a'lochi o'quvchilar soni yana-da ortishiga tilakdoshlar.

Maktab direktori O. BAXRIYEV

Shuhrat Ubaydullayev o'z ustida tinmay ishlaydi, a'lochi va iqtidorli o'quvchi sifatida sinfdoshlari orasida obro'ga ega. Do'stlariga g'amxo'r, kamtarin va to'g'riso'z o'quvchimizga doimo omad tilaymiz.

Sirdaryo viloyati, Mirzaobod tumanidagi A.Navoiy nomli 1-umumta'lim maktab direktori Sh. JUMAYEVA,

sinf rahbari G. AHROROVA

A'lochilar



«O'ZBEGIM MALIKASI»

O'zMU qoshidagi Sobir Rahimov akademik litseyi o'zining oqil-u dono, iqtidorli-yu iste'dodli talabalari bilan nom taratgan. Maskanda o'tkazilgan navbatdagi bahor tantanalarida ishtirok etib, bir olam taassurot oldim. Navro'z-ga atalgan ushbu tadbirda Milliy universitet rektori G'afurjon Isroilov, o'rta maxsus kasb-hunar ta'lim bosh boshqarmasi boshlig'i Shavkat Javlonov so'zga chiqdi. Bayramda Ruhshona Niyozxo'jayeva «O'zbekim malikasi» deb e'lon qilindi. Zulfiya nomidagi Davlat mukofoti sovrindori Dilafro'z Usmonova ham O'zMU rektorati tomonidan rag'batlantirildi...


–Uzluksiz ta'lim tizimining joriy qilinganligi davlatning rivojlanishi va yuksalishining asosiy mezonidir. Shu jumladan, O'zMU ma'muriyati, xususan, rektor T.N.Dolimovning sa'y-harakatlari natijasida 1996 yil zamonaviy talablarga javob beradigan gimnaziya tashkil etdi, - deydi akademik litsey rahbari Nasiba Narziqulova. – Gimna-

ziyada pedagogik salohiyati yuqori bo'lgan o'qituvchilar jamoasi to'planganligi, o'quv-tarbiyaviy ishlarda erishgan yutuqlarni nazarda tutgan holda, 2000 yili «Akademik litsey» maqomi berildi. Bugungi kunda iqtidorli o'quvchilarimiz aniq, tabiiy, ijtimoiy gumanitar va xorijiy filologiya, iqtisod yo'nalishlari

bo'yicha uch yil davomida tahsil olib kelmoqda. 700 nafar o'quvchi yoshlarga ta'lim berishda 60ga yaqin o'qituvchilar, fan nomzodlari va professorlar tinmay izlanishda.

O'quvchilarimiz tuman, shahar, respublika fan olimpiadalarida faol ishtirok etib, faxrli o'rinlarni egallab kelishmoqda.

Nargiza ABDULLAYEVA
yozib oldi




Nashriyot sahifasi

«O'zbekiston»
nashriyot matbaa ijodiy
uyi professional boks
bo'yicha jahon chem-
pioni unvonini qo'lga
kiritgan hamyurtimiz

Men uchun O'zbekiston shaxsini himoya qilishdan muqaddas narsa yo'q.

Ruslan Chagaev



Ruslan Chagaevga bag'ishlab «Men uchun O'zbekiston sha'nini himoya qilishdan muqaddas narsa yo'q» «plakati» va cho'ntak «kalendari»ni ko'p ming nusxada nashrdan chiqardi.

2007

Chagaev

14
APRIL

JAHON BOLALAR YOZUVCHILARI IJODINI O'RGANAMIZ

Bugundan e'tiboran jahon bolalar yozuvchilari ijodi bilan tanishtirib boramiz.

Janni Rodari degan yozuvchi bor. U bolalar uchun ajoyib-g'aroyib ertaklar yozgan. Yozuvchining «Telefonda aytilgan ertaklar» kitobini o'qisangiz, juda ko'p narsalarni bilib olasiz.

Uning qiziqarli bir ertagini o'qib ko'ring.



KEL, RAQAM O'YLAB TOPAMIZ

I bola: – Kel, raqam o'ylab topamiz!

II bola: – Bo'pti. Men birinchi! Salkam bir, salkam ikki, salkam uch, salkam to'rt, salkam besh, salkam olti...

I bola: – E! Bu judayam kam-u. Mana, menikini eshit: milliard-u milliard, saksilyard-u seksilion, kvintilon, bikvintilyard.

II bola: – Ko'p kerilmagin! Men karra jadvalni o'zimcha tuzib beraman. Mana, eshit:

Uch karra bir «Baqqa kir».

Uch karra ikki «Burgut va ukki».

Uch karra uch «Sherda bor kuch».

Uch karra to'rt «Daraxt mo'rt».

Uch karra besh «Daryoni kech».

Uch karra olti «Boshim qotdi».

Uch karra yetti «Kema ketdi».

Uch karra sakkiz «Qirg'oqda qoldik biz».

Uch karra to'qqiz «Ikki bola-yu bir qiz».

Uch karra o'n «Endi yechildi to'n».

I bola: – Somsa necha pul turadi, qani, shuni tez ayt-chi?

II bola: – Burunga ikki marta chertish.

I bola: – Bu yerdan Milangacha qancha?

II bola: – Qirq to'qqizdan qirqta va o'n ikki dyujina yangi kilometr, bitta eski va uchta yangi shokolad.

I bola: – Bir tomchi ko'z yoshining og'irligi qancha?

II bola: – Har kimning ko'z yoshi har xil-da. Injiq, serxarxasha qizning ko'z yoshi shabadadan ham yengil, och bolaniki butun yer kurrasidan ham og'ir.

I bola: – Ertak juda cho'zilib ketdi-ya?

II bola: – Judayam.

I bola: – Bo'lmasam, tepalikda yana bir necha raqam o'ylab topamiz. Modenda qanaqa sanashadi? «Birlam, ikkilam, uchlam – to'rt kallavaram, besh – qayiqni esh».

II bola: – Senga Rimda qanaqa sanashlarni aytib beraman. «Birdur, ikkidur, uchdur – kallasi puchdur, oltidur, yettidur – marraga yettidur, to'qqizdur, o'ndir – hammasi jo'ndir, mana shu hisob – yo'lini o'zing top!»

Ertakni o'qib, mazza qildingizmi?

Endi uni diqqat bilan qaytadan o'qing.

Milliard, saksilyard, seksilion, kvintilon, bikvintilyard. Sizlarga nimalarni eslatyapti? Matematika ustozingiz bilan bu haqda so'zlashib ko'ring.

«Bir tomchi ko'z yoshning og'irligi qancha?» degan savolga o'rtog'i nega bunaqa javob qildi? Hozircha bular to'g'risida o'zingiz mulohaza qilib ko'ring. Javob topsangiz, bizga yo'llang! Va gazetamizning keyingi sonlarini kuzatib boring, bu to'g'rida biz sizning va o'zimizning javoblaringizni e'lon qilamiz.



Kattalar, e'tibor bering!

o'zini bosdi. Jamoat joylarda o'zini tutish odobi haqida bundaylarga necha marta gapirish mumkin, bilmadim?! Axiyri bo'lmadi. Orqa o'rindiqda o'tirgan bir onaxon: «Kimga gapiryapti u bola? Haydovchiga desam, boyatdan beri shofyor bolam indamaydi», dedi soddalik qilib. Kimdir: «Onaxon, qo'l telefonda gaplashyapti-yu», deb tushuntirdi. «Voy, tavba, ko'chadayam gapi tugamaydi bu yoshlarni. Telefonda nima ishni qoyillatadi endi bular», dedi u yana ajablanib.

Ha, onaxonning gaplarida jon bor. Mushtday yigitcha telefonda qanday muhim ishini hal qilishi mumkin?!

«MENING SOTKAM BOR!»

Bilasizmi, nima uchun o'quvchilarga maktab formasi joriy

BOLANGIZNING SOG'LIG'I

NECHA PUL?

Uyali aloqa telefonining muhim va tezkor ishlarni bajarishda qo'l kelishi barchamizga ma'lum. Ammo uning o'quvchi-yoshlar uchun qanday foydasi-yu qulayligi borligini aytib bera olasizmi? Balki ba'zi ishi tig'iz ota-onalar telefon orqali farzandlaridan xabardor bo'lib turishar. Lekin foydasidan ko'ra zarari ko'proq buyum uchun mablag' sarflash qaysi ota-onaga ma'qul bo'ladi?!

SALOMATLIK – TUMAN BOYLIKMI YOXUD SOTKA – ULKAN BOYLIK?!

Inson uchun eng katta boylik – salomatlik ekan, demak, har qanday ish, buyumdan sog'liqni ustun qo'yishimiz kerakmi?! Shunday bo'lsa, sizning «sotkangiz» sog'lig'ingizga ta'sir qilishini bilasizmi?! Mutaxassislarning fikricha, uyali aloqa telefonidan taraladigan nur quloqqa va tikilib har safar qaraganda ko'zga ma'lum ma'noda salbiy ta'sir ko'rsatadi. Ba'zilar sotka tutib kerilishadi. Lekin inson noyob buyumi va kiyimi bilan boy yoki obro'li bo'lib qolmaydi. Donolar sog'lom insonni eng boy odam deb hisoblashgan.

«PASTROQ GAPIRING, YIGITCHA!»



Marshrutkada bir «yigitcha» uyali aloqa telefonida gaplashib ketyapdi. U haydovchining yonidagi o'rindiqqa o'tirib olgan, qani endi suhbatini tugatsa! Boz ustiga, baland ovozda hirlingagancha gapirib ketmoqda. Haydovchi bir qaradi, indamadi, ikki qaradi,



etilgan?! O'quvchilar o'zaro teng bo'lib, faqat bilimda musobaqalashishlari uchun, qolaversa, kamtarlik, tartib-intizom degan tushinchalarni anglab yetishlari uchun... Lekin maktab formasi-ku alohida mavzu, hozir o'quvchilar ana shu «sotka» orqali bir-birlarini ajrata boshlashayapti. Sotka bolalar uchun nima berishi mumkin?! O'quvchi uchun u faqat maqtanish vositasi bo'lib qolmoqda, nazirimda. Qolaversa, fikri-xayolini o'qishga qaratishi kerak

bo'lgan o'quvchini telefon chalg'itmaydimi?! Misol uchun, «Oila rishtalari» nomli turk serialidagi Ahmedga dadasi telefon olib bergach, maktabda bo'lgan voqeani ko'rgandirsiz?! Onasiga esa yana tashvish keltirdi.

Serialning o'sha qismidan olgan xulosangiz qanday bo'ldi, uyali telefon o'quvchiga kerak buyum ekanmi?!

ENDI NIMA DEYSIZ?

«O'ylab ish qil, keyin pushaymon bo'lma, bolam!» deyishadi kattalar. Biz sizga nasihat qilmoqchi emasmiz. Faqat o'ylamay qilayotgan ba'zi ishlaringizning ayrim xususiyatlarini ko'rsatib berishga harakat qildik. Va har doim sog'lig'ingizga e'tibor berishingiz zarurligini eslatib qo'ydik. Bu yog'i sizga havola.

Sayyora JO'RAYEVA

Bugungi aksariyat o'quvchilarning «sotka olib bering» deb qilayotgan xarxashasini siz ham eshitgandirsiz?! O'smirning bu «qistoviga» ba'zi ota-onalar e'tibor berishmasa-da, ayrimlari «bolam hech kimdan kam bo'lmasin», deb harakatga tushib qolishadi. «Hamma o'rtoqlarida bor ekan-da», deb farzandini oqlayotgan ota-onaga esa nima ham derdingiz?! Lekin bugun shu bahona ushbu mavzuga qo'l urdikki, o'quvchi navbatdagi xarxashasini boshlashdan avval bizning yozganlarimizni esga olsa, ajabmas!

(Davomi. Boshi o'tgan sonlarda)

–Ho'v anavi yong'oqning betiga qara, –dedi Begzodga, –ko'rdingmi? Ikki bolasini dumalatib o'ynatayapti-ku shu ona ayiq.

–Ha, ha, ko'rdim! –deb qichqirdi Begzod.

–Bo'rilarni nega qo'riqlaysiz, Esirgap og'a? –dedim. –Axir ular qo'ylarimizga qiron keltiradi-ku?

–Qo'y ko'p, bo'ri oz, –dedi Esirgap, –agar bo'rilarni qo'riqlab yurmasak, odamlar ularni qirib yuboradi. Tog' bo'risi, ayig'i, shoqoli, tulkisi bilan tog'da. Bu yerlarni bekorga qo'riqxona deb qo'yibdimi, inim?

Boyadan beri ko'nglimda bir savol aylanib turibdi, uyalib aytolmayman. Shokir do'stinga mo'miyo topish kerak. Mo'miyo tog'larning eng ichkarisida bo'ladi deb eshitganman. Oxiri sabrim chidamay so'radim:

–Esirgap og'a, ozgina mo'miyo kerak edi, topilmasmikin?

Esirgap ensasini qashlab, o'ylanib qoldi.

–Mo'miyo... Topiladi-yu, biroq, juda qiyinda uni olish. Tik jarlikda, g'orlarda bo'ladi. Otang rozi bo'lsa, ertaga bir yerga borib kelardik.

Kechqurun yotar mahali otamning etagiga yopishib, elandim:

–Shokir o'rtog'im oyog'ini sindirib oldi. Shunga danakday mo'miyo kerak ekan. Tovlarda bo'ladi, deyishadi, topishib bering...

Baxtinga otam rozi bo'la qoldi.

–Mo'miyoni ho'v Qizuchgan yerda bir o'ngirda bor deyishadi. O'zim ko'rmaganman. Ertan bir borib kelaylik-chi. Zora, do'stingning omadi bor bo'lsa.

Azonda choydan keyin beshalamiz uch otda yo'lga chiqdik. Sharqiroq soylardan o'tdik, qalin chakalakzorlar

ortda qoldi, chim bilan qoplangan o'tloqlarni bosib, Qizuchgan degan yerga ham yetib keldik. Otam otdan tushib, archazorni oralab ketdi. Ancha vaqtdan keyin qaytib keldi.

–Adashmasam, ho'v yerdagi o'ngir edi. Bir urinib ko'raylik-chi, yuringlar.

Otlarni yetaklab yayov pastga endik. Tiklama yo'l chetida yolg'iz daraxt. Qayinmi, terakmi, ishqilib tanasi oq, o'zi uzun. Shu daraxtning yonida og'zini o'choqday ochib turgan o'ngir bor ekan. Otlarni bir-biriga bog'lab qo'ydik.

–Uzun arqonni olib kel, –dedi otam. Yugurib borib, xurjundan dumaloq chilvini ko'tarib keldim.

–Esirgap, belingga boyla! –dedi otam. Esirgap og'a chilvini ikki qavat qilib beliga mahkam bog'ladi. Arqonning bir uchini daraxtga uladik.

–Esirgap, qalamtaroshingni ol, mo'miyoni qirib olasan, –dedi otam. Esirgap «Bismillo!» deb o'ngir og'ziga keldi. Butini kerib, asta-asta pastga tusha boshladi. Otam bilan Omontoy arqonni qarichlab qo'yib yuboryapti. Bir zamon chuqurdan «To'xtanglar!» degan bo'g'iq ovoz chiqdi. Otam bilan Omontoy arqonni qattiq tortib turishdi. Birozdan keyin

yana «Tushiringlar!» degan tovush eshitildi. Arqonni bo'shatishdi. So'ng yana tortib ushlab turishdi. Bir soatmi, ko'proqmi, «Tushiring! To'xtang!» lardan keyin Esirgapning «Tortinglar!» deganini eshitdik. Sanab turdim. Otam bilan Omontoy bir o'n martacha tortishdi

arqonni. Demak, o'lganda olti-yetti metrcha pastga tushibdi-da Esirgap og'am.

O'ngirning teshigida Esirgapning kallasi ko'rindi. Uning basharasi chang-chung, burniga, peshonasiga bir balolar yopishgan. Esirgap og'a teshikdan irg'ib chiqdi-da, belidagi arqonni yechdi. Keyin qo'ynidan mushtday qop-qora, yelimday yopishqoq narsa olib berdi.

(Davomi bor)

(Sarguzasht qissa)

«ISTE'DOD MALIKASI»

Toshkent Davlat Soliq Akademiyasida «Iste'dod malikasi» nomli ko'rik-tanlov o'tkazildi. Unda Dilfuza G'ulomova eng jozibali, Umida Madrahimova eng zukko, Gavhar Boymatova eng shaddod qiz va Nargiza Fayziyeva go'zallik malikasi deb topildilar.

«Iste'dod malikasi» bo'lish esa Nozimaxon Shomurodovaga nasib etdi.

Nargiza SAYDULLAYEVA,
«Yangi avlod» media markazi a'zosi

Qizaloqlar – qizg'aldoqlar**ENG NAMUNALI QIZ**

Yaqinda «Gulobod» mahallasida «Mahallaning namunali qizi» ko'rik-tanlovi bo'lib o'tdi. Unda 16-18 yoshli qizlar tanishtiruv, pazandachilik, soch turmagi, erkin mavzu va savol-javob shartlari bo'yicha ishtirok etishdi. «Gulobod» mahallasining faxri Qunduzxon Egamova «Mahallaning eng namunali qizi» yo'nalishi bo'yicha munosib taqdirlandi. U tuman bosqichida ham ishtirok etib, «Mahallaning eng iste'dodli qizi» nominatsiyasini qo'lga kiritdi.

–Men tumanimizdagi 48ta mahalla orasidan «Mahallaning eng namunali qizi» deb tan olinganimdan baxtiyorman, deydi g'oliba. – Mening bunday

yutuqlarga erishishimda yaqindan yordam bergan mahallamiz oqsoqoli Xurshid aka va Hilola opalarga, qolaversa maktabimiz rahbari Rahima opa Bobojonova, sinf rahbarimiz Iroda opa Soipova va ota-onamlarga o'z minnatdorchiligimni bildiraman.

Umid ELMURODOV**SHE'RIYAT****LOLA GULIM**

Ochildingmu lola gulim,
Bag'ring bo'lib tilim-tilim?
Senga yetib kelmoq uchun,
Ado bo'ldi mening dilim.

Taxting buncha baland ekan,
Me'mori sarbaland ekan.
Xaridoring mendek yonib,
Yurgan oyoqyalang ekan.

Qizg'onadi tog'lar seni,
Maysalarga bog'lar seni.
Tush ko'radi uzun tunlar,
Qancha dili dog'lar seni.

Keldim, sening qasding bilan,
Boshing silay kaftim bilan.
Dardlarimni to'kib-to'kib,
Orom olay tafting bilan.

Ochildingmu lola gulim,
Bag'ring bo'lib tilim-tilim?
Senga yetib kelmoq uchun,
Ado bo'ldi mening dilim.

Ahtamqul KARIM,
Surxondaryo

YURTIM BAYROG'I

Hilpirar tug'imiz hur,
Boshimiz uzra mag'rur.
Millatimiz g'ururi –
Dillarimiz sururi.

Ozod Vatan, hur bo'ston,
Faxrimdir O'zbekiston!
Turfa rangda tovlanur
Bayrog'imiz shukuhi.
Unda mujassam erur –
Ulug' bobolar ruhi.

Ozod Vatan, hur bo'ston,
Faxrimdir O'zbekiston!
Bayroqni ko'tar baland,
Yuzimiz bo'lsin yorug'.
Istiqlol tug'i birlan –
Dunyoga soldik dovrug'.
Ozod Vatan, hur bo'ston,
Faxrimdir O'zbekiston!

Farruh OCHILOV,
Toshkent viloyati,
Toshkent tumanidagi
I-maktabning
5-«G» sinf o'quvchisi

SAMARQAND


Qayda bo'lmay seni eslayman,
Ona shahrim – go'zal Samarqand.
Bir umrga madhing kuylayman,
Bo'lay deyman senga chin farzand.
Bir-biridan go'zal va ko'rkam,
Ko'p shaharlar bordir dunyoda.
Hech biriga o'xshamaysan sen,
Hammasidan o'zing ziyoda.
Bizlar sening dur-u gavharing,
Yurtimizning marjoni o'zing.
Chiroyingdan ko'zin uzolmas,
Meningdek bir baxtli, hur qizing.

Amira SHUKUROVA,
Samarqand viloyati, Samarqand tumani,
Agrosanoat kasb-hunar kolleji talabasi

Bu voqeani menga yaqinda dadam so'zlab berdilar.

O'shanda bahor oylarining boshlari, yog'in-sochin ayni avjiga chiqqan palla ekan. Dadam Oq qashqa laqabli otlari bilan cho'ponlarga oziq-ovqat, dori-darmon tashlab kelish uchun toqqa chiqib ketibdilar. Ko'zlangan manzilga yetib borgach, cho'ponlar bilan biroz suhbatlashib o'tiribdilar. Ertalab charaqlab turgan quyosh kechga borib bulutlar ortiga yashirinib olibdi. Birdan bulutlar quyushlab, chaqmoq chaqa boshlabdi. Cho'ponlar otarni panaroq yerga hayday boshlashganida, dadam otga mingashib yo'lga tushibdilar. Birdan qattiq shamol turib, sharros yomg'ir quyib yuboribdi. Yomg'ir shu qadar kuchli ekanki, bir qadam oldinni ko'rish amri mahol bo'lib qolibdi. Shu payt otning oyog'i loyda toyib ketibdi. Dadam ot bilan birga yiqilib ketibdilar. Ular pastlay boshlashibdi. Ot qattiq kishnab, harchand oyoqqa turishga urinmasin, tura olmabdi.

DADAMNING



VAFODOR OTI

Sirpanchiq loyqa suv toshlar bilan aralashib, jar yoqasiga olib borib qo'yibdi. Shunda dadam pastga osilib qolibdilar. Ot ham tushib ketadi, degan qo'rquv qamrabdi ularni... Oq qashqa bor kuchi bilan bir siltanib turibdi-yu, oyoqlarini yerga tirab olibdi va orqaga tisarila boshlabdi. Sekin-asta pastga sirilib ketayotgan dadam Oq qashqaning nima qilmoqchi ekanini bilibdi-yu, arqonga mahkam yopishib olibdi. Ot sirpana-sirpana ularni jordan tortib olibdi. Dadam yuqoriga eson-omon chiqib olgach, otni mahkam quchoqlab olibdi. Chunki Oq qashqa ularni bir o'limdan saqlab qolibdi-da. Sel tingach, uyga yo'l olgan dadam ko'kraklaridagi og'riqdan hushlarini yo'qotay debdi. Shunda

Oq qashqa yiqilib tushishlariga yo'l qo'ymay, qattiq kishnay boshlabdi. Otning bemavrid kishnashidan xavotir olgan qo'ni-qo'shnilar dadamga yordam berishga oshiqishibdi...

Shu tariqa Oq qashqa dadamni qutqarib qolgan ekan.

Nuriddin SIROJIDDINOV

Aziz bolajonlar!

«Kunlardan bir kun» sahi-famizda bu safar ham ko'z ko'rib, quloq eshitmagan g'aroyib voqea-hodisalarni e'tiboringizga havola etmoqdamiz. Siz ham o'z maqolalaringiz bilan ishtirok etishni istasangiz, bobo-yu buvilaringizdan eshitganlaringizni tahririyatga yozib yuboring. Maktublaringizni kutib qolamiz.

Kunlardan bir kun...

niqtalardim. Shunda dadam: –Sekin kelaver, bolam, meni ko'zdan qochirmasang bo'ldi, - deb kulib qo'yidilar. Tong saharda yo'lga chiqqan bo'lsak-da, qishloqqa peshinda kirib bordik. Havo isib ketgan, yaktagim badanimga chippa yopishib qolgan edi. Amakimlarning uylari muzdekkina ekan. Salqin uyda amakim dadam bilan yonboshlashib rosa gurunglashishdi. Gurungga men ham qo'shilib turardim. Shunda amakim: –Daraga bo'ri oralaganmish, qishloqqa-ku yaqinlashisholmaydi-ya, ammo mehmonlarga qiyin bo'layapti. O'tgan hafta Salim

chatoqning qo'yi yo'qolib qolgandi, daradan suyaklarini topishibdi. Bechora qo'y

Birdan dadamning oldilaridan bir narsa «lip» etib o'tdi. Ot hurkib, pishqira boshladi. Eshagim ham biror xavfni sezganday joyida turib qoldi. Dadam miltiqni olib o'q uzdilar. Ot o'qning ovoizidan hurkib, dadamni yiqitib yubordi. Men irg'ib tushib, dadamni ko'tarib oldim. Bu orada atrofimizda allaqanday sharpalar aylana boshladi. Irillagan ovoizdan hushyor tortdik: bo'rilar! Dadam miltiqdan yana ketma-ket o'q uzdilar. Shu payt yelkamda qattiq og'riq sezdim, dada, deb baqirdim bor ovoizim bilan. Dadam meni siltab tashladilar-da, yelkamga yopishgan bo'rini ulotqirib yubordilar. Birdan boshqa bo'ri dadamga yopishdi. Miltiq qayoqqadir uchib ketgan, dadam ikki qo'llari bilan bo'rining tomog'ini mahkam ushlab olgandilar. Keyin bo'rining jag'iga mahkam yopishdilar-u, ikkiga ayirib tashladilar. Bundan sarosimaga tushib qolgan boshqa bo'rilar ortga

chekinibdi. Shu payt otlarning dupuri eshitildi.

Bizdan baribir

ko'ngillari tinchimagan amakim ortimizdan yetib kelgandi. – Oting qishloqqa boribdi, biror gap bo'ldimi deb qo'rqib ketdim, yigitlar bo'rilarini quvib ketishdi. Hademay kelib qolishadi. Mana, otingni ol, kettik, ortga qaytamiz,- dedilar-da, yo'l boshladilar. Dadam ikkimiz ularning ortlaridan ergashdik. Yelkam zirqirab og'rir, chamamda, bo'ri qattiq timdalagan ko'rinaradi. Uyga yetib kelgach, yelkamga bog'lam qo'yishdi. Ertasi kuni qishloq ahli kechasi yer tishlagan bo'rilarini tomosha qilish uchun kelishdi. Biz esa uyga yo'l oldik.

Mana, shunaqa gaplar, o'g'lim, agar o'shanda amakim kelib qolmaganlarida, bilmadim, holimiz ne kechardi?! - deb hikoyalarini yakunladilar bobom.

– Ammo bo'rining tirnoqlari qoldirgan iz yelkamni «tark» etmagan, - deb yelkalaridagi chandiqli ko'rsatdilar.

Oybek QAHRAMON o'g'li,
Toshkent viloyati, Parkent tumanidagi
27-o'rta maktabning 3-sinf o'quvchisi

BO'RILAR

HAM LASI



bo'rilarga yem

bo'libdi-da, - amakim chuqur uh tortib qo'yidilar, - yigitlar miltiq bilan chiqib ketishgan, ammo kunduzi topib bo'larmidi ularni? Kechasi to'da bo'lib ovga chiqadi zanqarlar... Sen ham uyingga ertaroq yetib ol, ketayotganingda mana bu miltiqni olib ket, bilib bo'lmaydi yirtqichlarni, - dedilar-da, devorga osilgan uzun ov miltig'ini ko'rsatdilar. Dadam ikkimiz biroz salqinlab olgach, qorinni to'yg'azdik, kech tushishi arafasida yo'lga tushdik.

– Erta saharlab ketarding,-dedilar amakim bizni kuzatar ekanlar, –xavotir olaman-da...

– Mendan xavotir olmang, aka, yonimda qalqonim bor-ku,-deb menga ishora qilib qo'yidilar dadam. Dara boshiga yetganimizda, g'ira-shira qorong'u tusha boshlagan edi. Birdan eshagimning oyog'i toyib ketib, yerga yiqilib tushdim. Men-ku mayli-ya, eshagim oqsoqlanib qoldi. Nima qilarimizni bilmay, uning oyog'iga qarab sekin-asta yura boshladik. Dadam mendan, men esa dadamdan xavotir olayotgandik.

Mening 70 yoshdan oshgan buvam bor. Ularnikiga borsam, menga qiziq-qiziq voqealarni aytib beradilar. Bu safar ham boshlaridan o'tgan bir hodisani so'zlab berdilar:

– O'shanda men o'spirin yigit edim, - deb gap boshladilar bobom. – U paytda mashinalar qayoqda, biror joyga boradigan bo'lsak, ot yoki eshakni egarlab, tongda yo'lga tushardik. Bir kuni dadam bilan qo'shni qishloqdagi amakimnikiga bormoqchi bo'ldik. Qishloqlarning orasi uzoq, buning ustiga tog' yon bag'irlab yurishimizga to'g'ri kelardi. Xullas, yo'lga tushdik. Dadamning ortlaridan qolmaslikka harakat qilib, eshagimni tinmay

BU AJIB

TUZ NOMI BILAN BOG'LIQ SHAHARLAR

1. Hindistondagi Levinaputra shahri o'zbekchada «Tuz shahri» deganidir.
2. Zalszugen ham tuz ma'nosini anglatadi.
3. Fransiyaning Marsel shahri «dengiz tuzi» demakdir.
4. O'zimizdagi Tuzkon, Sho'rtepa va Namakkan (Namangan) shaharlari ham tuz so'zi bilan bog'liqligini aytmasa ham bo'ladi.

QANCHA TUZ ISTE'MOL QILASIZ?

O'rta hisobda:

- bir kunda - 20 gramm;
- bir oyda - 600 gramm;
- bir yilda - 7 kilogramm.

Tuz bilan bog'liq so'z, ibora, maqollar:

Bir kun tuz yegan joyga qirq kun salom ber.

* * *

Bergan tuzimga roziman.

* * *

Sho'ri qurib qolibdi.

* * *


Bugun sira tuz totmadim.

TUZ - DORI

Ibn Sino aytadi:

... Oq tuz zehnni o'tkir qiladi. Bo'shashgan muskullarni mustahkamlaydi.

DUNYO



Arqon bog'lashni bilasizmi yoki tugun?

BILASIZMI?



joylarga mahkamlangan yog'och gardishlarga irg'itib tushirishgan. Sharni qo'l bilan ushlashga ruxsat berilmagan, u faqat tirsak, tizza va bo'ksa bilan o'ynalgan.

Rossiyada ham XVII asrda koptokni osma savatga tashlash o'yini bo'lgan. Agar bularni «Ibtidoiy basketbol» deb atasak, hozir biz bilgan basketbol 1890 yili AQSHdagi kollejlardan birida vujudga kelgan va o'sha yerda inglizcha «korzina» va «to'p» so'zlaridan «basketbol» atamasi kelib chiqqan. Ikk basketbol to'plari hozirgidek ipdan to'qilgan savatcha emas, balki shaftoli

teriladigan savatlarga tashlangan.

Antarktida yer yuzining dengiz sathidan eng yuqori nuqtasi hisoblanadi. Uning o'rtacha balandligi 2040 metr, eng yuqorisi 5140 metr.

1980 yilning yanvarida Janubiy qutbdan chamasi ming kilometr narida, 3560 metr qalinlikdagi muz qatlami ostida maydoni 27 kvadrat kilometrcha keladigan ko'l borligi aniqlangan.

Qit'aning markaziy qismida o'rtacha harorat minus 50 darajaga teng.

Agar Antarktidada muzlar erisa, dunyo okeani sathi 50 metrdan ham ko'proq ko'tarilishi, buning oqibatida quruqlikning anchagina qismini suv bosishi mumkin.

Antarktidada ham vulqonlar bor. Ana shunday vulqonlarning eng kattasi Erebus bo'lib, u Ross orolida joylashgan. U 3794 metr balandlikdadir.

Olamga mashhur kompozitor Volfgang Amadey Motsart musiqa yaratishni 3 yoshidan boshlagan.

Dunyoda eng ko'p tarqalgan erkaklar ismi Muhammad, ayollar ismi Anna bo'lsa, Chan eng ko'p tarqalgan erkaklar familiyasidir.

AQSHning Garvard universiteti dunyodagi eng obro'li, mashhur universitet hisoblanadi. Undan keyin esa Buyuk Britaniyaning Kembrij va Oksford universitetlari turadi.

Amerikaning Fort Xeys universitetining Nola Oks ismli talabasi 95 yoshda bo'lib, u dunyodagi eng keksa talaba hisoblanadi. U o'zining nabirasi bilan diplom olishi yana-da quvonchlidir.

Qutb ayiqlari 40 kilometr-soat tezlikda yugurishadi.

Sahroyi Kabir tarixida bir marta, ya'ni 1978 yilning 18 fevralida qor yoqqan.

Nil daryosi ikki marta - IX va XI asrlarda muzlagan.

Italiyada mavjud «Barbi» qo'g'irchoqlari soni jihatdan Kanadada yashovchi tub aholidan ham ko'proq.


Odam va fillar boshi bilan suza oladigan yagona sut emizuvchilardir.

Pingvinlar 1,5 metrga sakray olish qobiliyatiga ega.

Tabiatning tengsiz boyligi hisoblanmish daraxtlar eng ko'p umr ko'risharkan. Saksovil 50-60, terak 70-80, tok-uzum 100-150, tol 300, tog'pistasi 350, tut 400, qarag'ay 700-1000, chinor 1000, eman 2000, shamshod 3000, mamont daraxti hatto 6000 yil gurkirab o'sib turishi mumkin ekan.

Ikki yarim ming yillar ilgari hindular «Pokta-pok» o'yinini o'ynashgan. Ular kauchuk sharlarini baland

«AYLANA» BOSHQOTIRMASINING javoblari



TONG YULDUZI

BOSH MUHARRIR v.b:
To'lqin HAYITOV

Gazeta O'zbekiston matbuot va axborot agentligida 0208-raqam bilan 2007 yil 2 fevralda ro'yxatdan o'tgan.

TAHRIR HAY'ATI:
Turobjon JO'RAYEV,
Dilbar ALIMJONOVA,
Qahramon QURANBOYEV,
Jabbor RAZZOQOV
(«O'zbekiston» NMIU bosh muharrir o'rinbosari),
Dilmurod RAHMATILAYEV,
Dilshoda DADAJONOVA,
Feruza JALILOVA
(Bosh muharrir o'rinbosari),
Sobirjon SHARIPOV,
Ergashvoy SARIQOV.

Manzillimiz:
700129,
Toshkent shahri,
Navoiy ko'chasi, 30-uy.
Obuna indeksi: 198.
e-mail: tong1924@mail.ru
Tel: 144-27-25 144-63-08
Tel/ faks: (99871) 144-38-10

Rassomlar:
Nodira MIRZAYEVA,
Feruz MATYOQUBOV.

Noshir:
«O'zbekiston» nashriyot-matbaa ijodiy uyi.
Gazeta «O'zbekiston» nashriyot-matbaa ijodiy uyi kompyuter bo'limida terib. sahifalandi va chop etildi. Gazeta haftaning dushanba kuni chiqadi. Hajmi A-3, 2 bosma taboq.
Adadi - 60567
Buyurtma N: J 3563

Muassislar:

O'zbekiston matbuot va axborot agentligi, O'zbekiston Respublikasi Xalq ta'limi vazirligi, «KAMOLOT» Yoshlar ijtimoiy harakati, «SOG'LOM AVLOD UCHUN» hukumatga qarashli bo'lmagan xalqaro xayriya jamg'armasi.

Dizayner va sahifalovchi:
Fazliddin SHOYODGOROV

Navbatchi:
Gulyuz ORIFJONOVA